

**Inatsisartut Naalakkersuisullu pillugit Inatsisartut inatsisissaattut siunnersuut**  
(*Naalakkersuisut Siulittaasuat*)

**pillugu**

**Inatsit Atortinneqarnerannut Ataatsimiititaliap**

**ILASSUTITUT ISUAMALIUTISSIISUTAA**

**Siunnersuutip pingajussaaneerreqarnerani saqqummiunneqartoq**

Ataatsimiititaliaq suliarinninnermini ukuninnga inuttaqarpoq:

Inatsisartunut ilaasortaq Isak Hammond, Inuit Ataqatigiit, siulittaasoq  
Inatsisartunut ilaasortaq Andreas Uldum, Demokraatit, siulittaasup tullia  
Inatsisartunut ilaasortaq Debora Kleist, Inuit Ataqatigiit  
Inatsisartunut ilaasortaq Doris Jakobsen, Siumut  
Inatsisartunut ilaasortaq Anders Olsen, Siumut

Siunnersuut aappassaaneerreqarami ataatsimiititaliamut suliarineqartussanngorlugu inner-suunneqarpoq, tassa isumaliutissiissummi immikkoortup ataatsip iluarsisuteqarfigineqarnis-saa ataatsimiititaliamit ilaatigut kissaatigineqarmat.

Qulequttap: "Inatsisartut siunnersuummik siullermeerinninnerat" ataani titarnertaap aappaani oqaaseqatigiit siulliit ataatsimiititaliamit peerneqarput, tassa oqaasertat atorineqartut paatsoor-titsisinnaammata.

Tamatuma kingorna immikkoortoq taanna ima oqaasertaqalerpoq:

*"Inatsisartuni Naalakkersuisunilu ilaasortat kalaallisut oqalussinnaanngitsut kalaallisuumut oqalutseqarnikkut qallunaatut oqalussinnaasariaqartut Inuit Ataqatigiit, Demokraatit, Kat-tusseqatigiit Patiiat aamma Attassut isumaqarput. Tamanna Namminersorneq pillugu inat-simmum tamatumunngalu nassuiaatinut naapertuuttutut isigineqarpoq. Taamaattorli kalaallit oqaasii naalakkersuinermik suliaqarnermi tunngavittut suni tamani atorineqassasut avaaqqun-neqarsinnaanngitsumik piumasaqaataassasoq Siumut isumaqarpoq."*

Inatsit Atortinneqarnerannut Ataatsimiititaliap ilanngullugu paasissutissiissutigissavaa Om-budsmandi ulloq 12. november 2010-mi ilisimatitsiffiusumik ataatsimiititaliap ataatsimeeqa-tigimmagu. Tassunga atatillugu Inatsisartut Naalakkersuisullu pillugit Inatsisartut inatsisaa-tut siunnersuut oqaluuserineqarpoq.

Ataatsimiinnermi oqaatigineqartut tunngavigalugit ataatsimiititaliap allannguutissatut siun-nersuummik saqqummiussinissaa pissutissaqanngitsoq ataatsimiititaliaq isumaqarpoq.

"Inuussutissarsiutit" aamma "atuuffiit" aalajangersakkami siunissami ilaatinneqartussanngor-lugit § 25-imut allannguutissatut siunnersuummik Naalakkersuisut pingajussaaneerinissamut saqqummiussippat. Inatsisartut siulittaasuat, Naalakkersuisut siulittaasuat Naalakkersuisuni-

luunniit ilaasortaq ivertinneqarnermi nalaani allanik "atuuffeqartoq" "inuussutissarsiuteqartorluunniit" taakkunannga tunuassaaq.

Inatsisartunut Naalakkersuisunullu ilaasortat aningaasarsiaqartitaanerat pillugu inatsisip nutarternissaa Inatsisartut Siulittaasoqarfiannit kissaatigineqarsimavoq. Inatsimmi tassani allasimavoq Inatsisartut imaluunniit Naalakkersuisut siulittaasui imaluunniit Naalakkersuisunut ilaasortat allanik atuuffeqarunik tamanna Qinigaanerup Misilinneqarnissaanut Ataatsimiititaliamut nalunaarutigissagaat, taassumalu atuuffiit taakku pigiinnerneqarsinnaanersut isummerfigissagaa.

Aalajangersakkami pineqartumi aningaasarsiaqartitsineq pineqanngimmat aalajangersagaq allanngortinngilluinnarlugu Inatsisartut Naalakkersuisullu pillugit inatsisissatut siunnersuummut nuunneqassasoq siulittaasup Naalakkersuisoqarfia siusinnerusukkut isumaqatigissuteqarfigineqarpoq.

Inatsisartut Siulittaasoqarfiata aningaasarsiaqartitsineranut inatsisip nutarterneqarneranik saqqummiussisuusoq paragraffip oqaasertaanik tamatumani luunniit periuuserineqartumik allannguinissaq kissaatigisimangilaa.

Tamanna tunngavigalugu Qinigaanerup Misilinneqarnissaanut Ataatsimiititaliap atuuffinnik ingerlatsineq Inatsisartut maanna ataatsimiinneranni oqaluuseraa aalajangiullugulu maanna periuuserineqartut attatiinnerneqassasoq, taannalu malillugu siulittaasut arlaata Naalakkersuisunulluunniit ilaasortat arlaata atuuffinnik ingerlatsisinnaanerata ersarippoq, tassa tamanna siulittaasutut imaluunniit Inatsisartunut ilaasortatut atuuffimmuut sunniuteqassanngippat.

Ulloq manna tikillugu periuuserineqartoq malillugu naalakkersuinermik sulialik inuussutissarsiutaanik arsaarneqarneq ajorpoq, assersuutigalugu umiatsiaararsortoq tulaassuisinnaajunnaarsillugu umiatsiaaqqaminik tuniseqquneqarneq ajorpoq imaluunniit naalakkersuinikkut suliallit politkerinngormissaat pissutiginnarlugu kilisaataatiminik/pisassiissutinik pigisaminnik tunisagarnissamut pinngitsaalineqarneq ajortut. Kioskimik pigisaqartoq kioskiutimi tuninissaanut pinngitsaalineqarsinnaassanngilaq.

Atuuffiit inuussutissarsiutillu Qinigaanerup Misilinneqarnissaanut Ataatsimiititaliamit imikkooortisimaneqartuarsimapput, tamannali § 25-imut allannguutissatut siunnersuutikkut nutaakkut tassungalu nassuiaatikkut allanngortinneqarpoq. Tamatuma kingorna Naalakkersuisoq umiatsiaaqqamik imaluunniit aktianik pisissaguni Qinigaanerup Misilinneqarnissaanut Ataatsimiititaliaq apereqqaarneqassaaq, suummi tamarmik inuussutissarsiutitut atorneqarsinnaammata.

Aalajangersakkap nuunneqarnissaani tamanna siunertarineqarsimangilaq.


Akerlianik naalakkersuinermik suliaqartoq Naalakkersuisutut atuunnermini nammineq soqutigisani pineqartillugit suliamut attuumassuteqarnini pissutigalugu peqataasinnaanngilaq. Periuuseq tamanna atorneqartuarsimavoq.

#### **Ataatsimiititaliap inassuteqaatai**

Naalakkersuisut allannguutissatut siunnersuutaat akuersissutigineqassasoq ataatsimiititaliap isumaqatigiittup inassutigaa.

Tamatuma kingorna iluserilikkamisut iluseqarluni Naalakkersuisut inatsisissatut siunnersuutaat akuersissutigineqassasoq ataatsimiititaliap isumaqatigiittup inassutigaa.

Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut pingajussaaniigassanngortippaa.



Isak Hammond,  
Formand




Andreas Uldum



Debora Kleist



Doris Jakobsen



Anders Olsen

11. november 2010

UKA 2010/24

## Allanngortitsinissamik siunnersuut

uunga

**Uunga siunnersuut: Inatsisartut Naalakkersuisullu pillugit Inatsisartut inatsisaat**

Pingajussaanneerinninnermut Naalakkersuisunit saqqummiunneqartoq.

## § 25-mut

1. § 25 imatut oqaasertalerneqassaaq:

“§ 25. Inatsisartut siulittaasuat, Naalakkersuisut siulittaasuat Naalakkersuisuniluunniit ilaasortaq ivertinneqarnermi nalaani allanik atuuffeqartoq inuussutissarsiuteqartorluunniit taakkunannga tunuassaaq.

*Imm. 2.* Inatsisartut siulittaasuata, Naalakkersuisut siulittaasuata Naalakkersuisuniluunniit ilaasortap atuuffiit inuussutissarsiutilluunniit taakku ingerlatiinnarumallugit kissaatigippagu Qinersinerup Misilinneqarnissaanut Ataatsimiititaliaq tamanna pillugu erngerluni nalunaarfigissavaa. Nalunaarutip tiguneraniit sapaatip akunneri pingasut qaangiutinnginnerini pineqartup atuuffimminik inuussutissarsiumminilluunniit taamaattunik ingerlatsiinnarnissaa ataatsimiititaliap itigartitsissutigisinnavaa.

*Imm. 3.* Inatsisartut siulittaasuata imm. 2-mi piffissaliussap naanerata kingorna atuuffiit inuussutissarsiutilluunniit sorliit siulittaasup ingerlatiinnarsinnaanera naluunarutigissavai. Inatsisartut siulittaasuata atuuffiit inuussutissarsiutilluunniit sorliit Naalakkersuisunut siulittaasup Naalakkersuisunullu ilaasortap ilaasortat sorlernik ingerlatsiinnarsinnaanersut Inatsisartunut nalunaarutigissavaa.

*Imm. 4.* Inatsisartut siulittaasuat, Naalakkersuisut siulittaasuat Naalakkersuisunilu ilaasortat atuuffinnik inuussutissarsiutinilluunniit pineqartunik ingerlatsinermik saniatigut atuuffinnik inuussutissarsiutinilluunniit nutaanik Qinersinerup Misilinneqarnissaanut Ataatsimiititaliaq akuersereersimatinnagu tiguseqqusaanngillat.”

Siunnersuummut oqaaseqaatit

**Oqaaseqaatit nalinginnaasut**

Siunnersuutip aappassaanneerneqarnissaanut Inatsisinik Atortitsinermut Ataatsimiititaliap isumaliutissiissutaa tunngavigalugu pisariaqartinneqalersimavoq atuuffinnik allanik atuuffeqarnissaaq pillugu aalajangersakkap erseqqinnerusunngortinneqarnissaa. Ataatsimiititaliap suliarinninnerani nalornissutigineqalersimavoq oqaatsimut “atuuffimmut” aammattaaq “inuussutissarsiutit” ilaanersut. Taamaalilluni allanngortitsinissamik siunnersuutikkut erseqqissarneqarpoq aalajangersakkamut atuuffik inuussutissarsiullu ilaammata.

## **Aalajangersakkanut ataasiakkaanut oqaaseqaatit**

*Nr. 1-imut*

Allanngortitsinissamik siunnersuutikkut erseqqissarneqarpoq Inatsisartut siulittaasuat, Naalackersuisut siulittaasuat imaluunniit Naalackersuisunut ilaasortaq pisortatigoortumik suliaminut peqatigitillugu allanik atuuffeqaraniluunniit inuussutissarsiuteqassanngitsoq, Qinersinerup Misilinneqarnissaanut Ataatsimiititaliaq akuersissuteqarsimangippat.